

REDE FETO LEVANTA PROBLEMA PROSTITUISAUN BA PRESIDENTE HORTA

Lamenta Forsa Halo Agresaun Fiziku Kontra Feto

Dili, STL, Sabadu, 27 Marsu 2010.

Organizasaun Naun Govermental (ONG), Rede Feto Timor Leste ne'ebe durante ne'e luta maka'as ba iguladade jeneru iha Timor Leste preokupa tebes prostituisaun livre ne'ebe namkari barak iha rai ida ne'e.

“Ami mai kolia ho Presidente kona-ba isue *trafiking* katak ema balun lori feto sira husi area rural no rai liu mai iha cidade hodi halo fali prostituisaun,” Direitora Board Rede Feto, Ivete de Oliveira, kasu lia hirak ne'e ba STL hafoin remata sorumutu ho Presidente Republika, Jose Ramos Horta iha Palacio Presidente Aitarak-Laran, Kinta (25/3) foin lalais ne'e.

Rede Feto tuir Ivete katak preokupa tebes ho hahalok ema sira ne'ebe laiha responsabilidade ba feto sira ne'e katak bosok feto sira husi rural no rai liur mai atu serbisu maibe realidade sira haruka halo prostituisaun (*sex worker*).

Tamba ne'e nia mos husu ba orgaun kompetente atu tau atensaun ba problema hirak ne'e atu nune'e bele minamiza no hamenus prostituisaun livre husi ita nia rai.

Lamenta Forsa Halo Agresaun Fiziku Kontra Feto

Rede Feto mos lamenta tebes ho atusaun oknum membrus PNTL no FFDTL balun ne'ebe involve halao intimidasaun fiziku barak liu hasoru feto tamba ne'e sira informa ba PR Horta atu nune'e bele tau matan mos ba problema hirak ne'e.

“Ami mos prekupa tebes ho ema sira ne'ebe kaer lei no orden ne'ebe ita fiar atu proteze no asegura siguransa ba ita maibe sira maka involve halo intimidasaun fiziku barak liu hasoru feto,” akuza Ivete relasiona ho oknum polisia no forsa ne'ebe sempre halo agresaun fiziku hasoru feto sira iha diskoteka nomos area rural.

Nia mos husu ba orgaun kompetenti atu aumenta treinamentu ba membrus sira atu nune'e bele aumenta moral no mentalidade bainhira halo atusaun.

“Prekupasaun ami nian maka trenamentu, oinsa orgaun kompetenti aferese trenamentu maximu antes ema sira ne'e kaer kilat no iha poder iha sira nia liman,” tenik nia.

Tuir nia Rede Feto Timor Leste nia observaun durante ne'e hatudu katak oknum polisia no forsa barak maka la merese atu kaer kilat tamba saida mak sira aprendre la tuir ho praktika iha treinu.

“Ita bele hare’e kuandu iha akontesementu ruma sira la uza maneira seluk maibe sira sempre foti dezisaun ikus maka uza kilat no fiziku hodi asegura problemas,” dehan nia.

Entertantu iha enkontru harmonia durante oras ida ne’e, Rede Feto mos informa kona-ba lalaok nain ulun sira nia ne’ebe sempre halo skandal ,iha fatin fatin no la faloriza sira nia fen kaben nudar parseira.

“Ami kritika sistema governo nian ne’ebe la hare ba lider politiku sira nia fen hanesan parseiru ida, viazen ba rai liur no areas rural sira nia fen la tuir sira ida,” hateten nia.

Tuir nia durante ne’e governo laiha atensaun masimu ba nain ulun sira nia parseiru rasik (fen-red) katak laos apoiu finanseirus maibe kuandu iha vizita do serbisu fen mos tenke partisipa.

“Ami la ijiji atu sira nia fen atu lao bebeik ho sira maibe devisin kuandu lori para povu bele hatene katak sira iha parseira ida, ne’e importante,” sujere nia.

Tuir nia katak, se-se deit mak sai lider klaru ka laiha ema ida maka perfekte maibe eskandalu sira ne’e la bele husi deit no hatete normal.

Prezidente Jose Ramos Horta mos prekupa tebes informasaun ne’ebe apresenta husi Rede Feto nian no nia promete sei kolia ho orgaun sira ne’ebe kompetenti atu haree kona-ba problemas no lansamentu hirak ne’e.

PR Horta mos sei organiza enkontru konjuntu ho orgaun kompetenti para bele hare’e problemas ne’ebe mosu ba feto li-liu isu trabailadora feto ne’ebe hetan salariu minimu tebes bainhira sira serbisu hamutuk ho ema Xina, India no Indonesia.

(Suara Timor Lorosae, edisaun Sabadu, 27 Mardu 2010, headline)

Rede Feto Timor Leste / East Timor Women Network	:
Contact	:
Rua Bispo de Madeiros - Mascarinhas	
Dili, Timor	Leste
Phone	: +(670) 3317405
Email	: redefeto@yahoo.com
Website	: www.redefeto.blogspot.com
www.Salurik.blogspot.com	
www.eleisaun2009.blogspot.com	
www.eleisaun2009photo.blogspot.com	
www.picasaweb.google.co.id/redefeto	